

卷八

清人逸事

清朝野史大

上海中華書局印行

清朝野史大觀 卷八

清人逸事

同光樞臣之消長

同光之際。當國樞臣。分數時代。同治初元。爲文祥、沈桂芬時代。時大亂初平。瘡痍未復。正可改革政體。以固國本。文祥雖不學無術。猶知引沈桂芬自助。實爲漢人掌握政權嚆矢。故李鴻章、翁同龢亦聯袂而起。時封疆大吏。漢人居半。卽樞要之地。實力亦漸加增。同治中葉。宇內得以少安者。職是故也。光緒初。變爲孫毓汶、徐用儀時代。然孫名爲漢人。實仰滿人鼻息。尤與李蓮英、狼狽爲奸。徐用儀則唯唯諾諾。聽孫指揮。十年至二十年。高陽常熟。又攜手入。然高陽守有餘而才不足。常熟極思振作。而掣於西后之肘。亦不能大展其長。且觸滿人之忌。故收場尤落寞。二十年後。則剛毅、榮祿時代。純爲滿人猿臂伸張之日。繼之者。奔動世續、那桐、沈澐。一氣固守藩籬。如瞿鴻禨、徐世昌、林紹年。皆在奔動之下。如張

之洞等。雖權力稍增。而爲日無多。不能發展矣。

文文忠溫禮學生

蔡毅若觀察名錫勇。言幼年入廣東同文館肄習英文。嗣經選送京師同文館肄業。偕同學入都。至館門首。剛下車卸裝。見一長髯老翁。歡喜迎入。慰勞備至。遂帶同至館舍。遍導引觀。每至一處。則告之曰。此齋舍也。此講堂也。此飯廳也。指示殆遍。其貌溫然。其言霽然。諸生但知爲長者。而不知爲何人。後詢諸生曰。午餐未。諸生答曰。未餐。老翁卽傳呼提調官。旋見一紅頂花翎者旁立。貌甚恭。諸生始知適才所見之老翁。乃文文忠也。

清朝諫臣

清朝諫臣。首數彭郭琇。至孫文定公嘉淦。以自是簾高宗。袁銳以寡慾規宣廟。昌言主德。風稜卓然。蓋古之遺直矣。而嘉道之間。蘇廷魁、陳慶鏞、朱琦爲諫垣三直。合之吾浙金應麟。世稱四虎。稍後王侍郎茂蔭、袁端敏甲三爲言官時。亦復侃侃論列。不避權要。端敏至劾及某郡王暨侍郎書元。雖文宗亦以爲已甚。非所宜言。同治一朝。張盛藻論同文館。邊寶泉參李伯相進瑞麥。及游

沈二君諫停園工諸疏皆剴切可誦。主聖臣直。遭其時然也。

吳可讀尸諫

光緒己卯春三月下旬。予在京住潘家河沿。是日天明。晴明。予正午飯。忽見空中有白片紛紛下。垂至庭中。視之。六出雪花也。瞬息卽化。炊許始止。不知烈日中何以忽然落雪。甚異之。數日卽聞吳柳堂侍御屍諫事。吳名可讀。甘肅人。由道光庚戌進士。部曹轉御史。以劾成祿言太激。左遷吏部主事。操行清潔。不附權貴。是年穆宗梓宮永遠奉安。吳乞派隨扈行禮。人皆以爲吳貧。冀博此數十金之車馬費耳。不意至薊州。遂密奏穆宗立後事。自盡於所居寺中。摺上。慈禧忽然天良發現。批云。以死建言孤忠。可憫云云。京師同官同年等。爲設祭於文昌館。挽聯無數。惟黃太史貽楫一聯最灑脫云。天意憫孤忠。三月長安忽飛雪。臣心完夙願。五更蕭寺尙吟詩。死時尙有絕命詩七律一首云。回頭六十八年中。往事空談愛與忠。坏土已成皇帝鼎。前星預祝紫微宮。相逢老輩寥寥甚。到處先生好好同。欲識孤臣戀恩所。惠陵

風雨薊門東。吳居南橫街。卽以宅爲祠祀之。其尸諫之疏曰。吏部稽勳司主事前。任河南道監察御史。臣吳可讀跪奏。爲以一死泣請懿旨。預定大統之歸。以畢今生忠愛事。竊罪臣聞治國不諱亂。安國不忘危。危亂而可諱可忘。則進苦口於堯舜。爲無疾之呻吟。陳隱患於聖明。爲不祥之舉動。罪臣前因言事忿激。自甘或斬。或囚。經王大臣會議奏請。傳臣質訊。乃蒙我先皇帝曲賜矜全。旣免臣於以斬而死。復免臣於以囚而死。又復免臣於以傳訊而觸忌。觸怒而死。犯三死而未死。不求生而再生。則今日罪臣未盡之餘年。皆我先皇帝數年前所賜也。乃天崩地圻。忽遭十三年十二月初五日之變。卽日欽奉兩宮皇太后懿旨。大行皇帝龍馭上賓。未有儲貳。不得已以醇親王之子承繼文宗顯皇帝爲子。入承大統。爲嗣皇帝。俟嗣皇帝生有皇子。卽承繼大行皇帝爲嗣。特諭罪臣涕泣跪誦。反覆思維。竊以爲兩宮皇太后一誤再誤。爲文宗顯皇帝立子。不爲我大行皇帝立嗣。則今日嗣皇帝所承大統。乃奉我兩宮皇太后之命。受之於文宗顯皇帝。非受之於我大行皇帝也。而將來

大統之承亦未奉有明文。必歸之承繼之子。卽謂懿旨內既有承繼爲嗣一語。則大統之仍歸繼子。自不待言。罪臣竊以爲未然。自古擁立推戴之際。有臣子所難言。我朝二百餘年。祖宗家法。子以傳子。骨肉之間。萬世應無間然。況醇親王公忠體國。中外翕然稱爲賢王。觀王當時一奏。令人忠義奮發之氣勃然而生。言爲心聲。豈能僞爲罪臣讀之。至於歌哭不能已已。儻王聞臣有此奏。未必不恕臣之妄。而憐臣之愚。必不以臣言爲開離間之端。而我皇上仁孝性成。承我兩宮皇太后授以寶位。將來千秋萬歲時。均能以我兩宮皇太后今日之心爲心。而在庭之忠佞不齊。卽衆論之異同不一。以宋初宰相趙普之賢。猶有首背杜太后之事。以前明大學士王直之爲國家舊人。猶以黃珌請二景帝太子一疏。出於蠻夷。而不出於我輩爲愧。賢者如此。遑問不肖。舊人如此。奚責新進。名位已定者如此。況在未定。不得已於一誤再誤中。而求一歸於不誤之策。惟有仰乞我兩宮皇太后再行明白降一諭旨。將來大統仍歸承繼大行皇帝嗣子。嗣皇帝雖百斯男。中外及左右臣工。均不得

以異言進。正名定分。預絕紛紜。如此則猶是本朝祖宗以來子以傳子之家法。而我大行皇帝未有子而有子。卽我兩宮皇太后未有孫而有孫。異日繩繩緝緝相引於萬代者。皆我兩宮皇太后所自出。而不可移易者也。罪臣所謂一誤再誤而終歸於不誤者此也。彼時罪臣卽以此意擬成一摺。由前察院轉進。呈底奏底俱已就草。伏思罪臣業已降調。不得越職言事。且此何等事。此何等言。出之親臣重臣大臣。則爲深謀遠慮。出之疏臣遠臣小臣。則爲干進希名。又思在諸臣中。忠直最著者。未必卽以此事爲可緩言。亦無益而置之。故罪臣且留以待。泊罪臣以查辦廢員內。蒙恩圈出。引見奉旨。以主事特用。仍復選授吏部。邇來又已五六年矣。此五六年中。環顧在廷。仍未有念及於此者。今逢我大行皇帝永遠奉安山陵。恐遂漸久漸忘。則罪臣昔日所留以有待者。今則迫不及待矣。仰鼎湖之仙駕。瞻戀九重。望弓劍於橋山。魂依尺帛。謹以我先皇帝所賜餘年。爲我先皇帝上乞懿旨。數行於我兩宮皇太后之前。惟是臨命之身。神志瞢瞢。摺中詞意。未克詳明。引用率多遺忘。不

及前此未上一摺之一二繕寫又不能莊正。罪臣本無古人學問。豈能似古人從容。昔有赴死而行不復成步者。人曰子懼乎。曰懼。曰既懼何不歸。曰懼吾私也。死吾公也。罪臣今日亦猶是鳥之將死其鳴也哀。人之將死其言也善。罪臣豈敢比曾參之賢。即死其言亦未必善。惟望我兩宮皇太后我皇上憐其哀鳴。勿以爲無病之呻吟。不祥之舉動。則罪臣雖死無憾。宋臣有言。凡事言於未然。誠爲太過。及其已然。則又無所救。言之何益。可使朝廷受未然之言。不可使臣等有無及之悔。今罪臣誠願異日臣言之不驗。使天下後世笑臣愚。不願異日臣言之或驗。使天下後世謂臣明。等杜牧之罪言。雖逾職分。効史鮪之尸諫。祇盡愚忠。罪臣尤願我兩宮皇太后我皇上體聖祖世宗之心。調劑寬猛。養忠厚和平之福。任用老成。毋爭外國之所獨爭。爲中華留不盡。毋創祖宗之所未創。爲子孫留有餘。罪臣言畢於斯。願畢於斯。命畢於斯。再罪臣曾任御史。故敢昧死具摺。又以今職不能專達。懇由臣部堂官代爲上進。罪臣前以臣衙門所派隨同行禮司員內未經派及罪臣。是以罪臣再

四面求臣部堂官大學士寶鑒。始添派而來。罪臣之死。爲寶鑒所不及料。想寶鑒並無不應派而誤派之咎。時當盛世。豈容有疑於古來殉葬不情之事。特以我先皇帝龍馭永歸天上。普天同泣。故不禁哀痛迫切。謹以大統所繫。貪陳悽悽。自稱罪臣。以聞謹奏。

吳可讀之風流倜儻

臯蘭吳柳堂侍御。少時頗倜儻。好狎邪游。不修邊幅。某科計偕入都。遨遊北里中。會試被擯。乃留京候再試。實則戀某妓不忍言別也。數月後資漸罄。其座師某公勸使出城。僦居九天廟。謂其地清僻遠城市。可一意讀書也。(九天廟在廣寧門外爲關中會館公產)侍御從其言往居之。甫三宿。鬱鬱不自得。俄勃然起曰。人生實難。何自苦如是。即日入城。仍宿某妓所。久之金盡。妓亦稍不禮之。漸至衣食不給。鄉人士始資以金。而要仍以仍居九天廟。否則不予金。侍御不得已乃快快去。都下人皆呼侍御爲吳大嫖。初京師鞠部向推三慶四喜。咸豐中葉四喜漸不振。諸伶謀散去。余三勝自江南歸。乃悉棄中金重新之。都人爲譏。聯曰。余三勝重與四喜班。而頗

難其對。至是或曰得之矣。吳大嫖再住九天廟。當其時聞者無不爲之絕倒。

王孝子尋親記

王政承德郡學諸生也。在襁褓時。父重華商於京師。以醉後與人鬪。毆誤殺人。亡命古北口。在園場爲人傭。作食力。自是三十餘年。音耗斷絕。政年弱冠。頗能讀書。時作尋父想。祖母林。母馬。哭挽之曰。汝知汝父貌乎。何尋爲。又數年。泣告祖母及母曰。天下無無父之國。今明父在。而任其飄流異域。不能服勞奉養。盡子職之一日。天下復何貴有人子矣。祖母曰。吾耄矣。豈不願汝父歸。第念汝足跡未嘗出里門一步。年來雖據道路傳言。汝父在古北口。然沙漠風雲。非汝所慣。而況外而道路崎嶇。內而家無擔石。資斧將焉措。政曰。無足慮也。兒自傭書賣字。以爲路費。卽不然。乞食亦所願也。祖母及母終禁之。政乃伺隙潛行。走京師。訪諸父執。僉曰。前數年確知其在古北口園場謀生。然一歲之間。屢易其地。已難蹤跡。況邇來久沈魚雁。仍在故處否。莫可稽矣。塞外荒涼遼闊。欲遍歷其境。雖窮年不可得。子將若之。何政

唯唯謝指導。竟赴園場。凡人跡可及處。無不到。見人卽拜問。或曰。彷彿有之。則喜。形於色。或曰。未之見也。則憂。從中來。茫茫然不辨東西。南朔。信足所至。日必百餘里。其間有竟日一食者。有竟日不一食者。有並日不得食者。夜則投古剎中棲止。或露宿巖壑間。往往遇虎狼。瀕死者屢。而政卒無退悔心。跋涉年餘。十指皴裂。雙足重繭。面目黧黑。形貌骨立。真乞人之不若矣。而尋父之志。雖百折不同。一日行至園場極北。倦極。見道旁關壯繆廟。趨憩廊下。坐而假寐。驀隴間聞門外喧呶聲。驚醒出視。見一叟揮拳鬪兩少年。少年皆仆。狼狽殊甚。而叟揮手毆不已。政勸止之。縱兩少年去。叟怒未息。政曰。昔者吾父以鬪誤殺人。遂出亡。吾至今猶有餘痛。故凡見鬪毆者。輒阻之不聽。則以身翼之。恐其踰吾父之轍也。叟誠勇。何必與此齟齬。少年較武。更由。給者。非此。問人顧何以至此。而慙敵之狀可掬也。政告以故。且拜問老父蹤跡。叟訝曰。汝吾子耶。吾王重華也。吾母林。猶健。惟耶汝母馬亦無恙耶。相與抱持大哭。遂偕歸。舉室相慶。閭里嘖嘖稱孝子。是年政遊郡庠。事在光緒初元也。

山東某令

江寧藩司長遠帆（祿）方伯觀察山東時。言夏日有某令分發到東省。初次謁撫軍。故事。凡僚屬初見長官。例須服蟒袍補服。雖酷暑不得免褂。維時正當炎夏。某令汗流浹背。熱不可當。因持所攜團扇。舉臂狂揮。撫軍曰。何不寬褂。令曰。是是。遂命僕輩代爲除之。既而揮扇如故。撫軍笑曰。何不解帶寬袍。令曰。是是因離座次第去之。歸座談笑益豪。舉動益肆。不覺將扇以左右手更遞互揮。逢逢有聲。撫軍不能忍。睨而戲之曰。何不並襯衫寬之。較爲爽快。令應聲解之。撫軍隨拱手請茶。左右傳呼送客。令倉卒無所爲計。急取纓冠戴諸頭。而以左腋夾袍服。右肘挂念珠。攜短衣。踉蹌而出。如雜劇中扮演小丑登場狀。官舍賓僚署中役吏。見者皆吃吃笑。不可仰。翌日而飭令回籍學習之示頒矣。令之狂態固可哂。而某撫軍亦真可謂惡作劇哉。

湖州某君

湖州某君。納粟爲縣令。歷任諸劇邑。專以鋤強悍折勢豪爲事。所至有強項令之目。而銜之者亦刺骨。某制軍

以不畏強禦舉之。非虛語也。當其任陸豐縣時。縣有土棍某。橫行一鄉。鄉人雖恨之。然知官必不敢懲治。亦遂無控之者。暨某君至。鄉人素聞其威名。乃聯名具呈控告。某君收其呈。不置可否。衆咸失望。迨次早。則某君已率健役至土豪所居。出其不意。擒之回署矣。衆駭其神速。相率往觀。至則自大堂以外。直至通衢。萬衆擁觀。幾無隙地。某君方坐堂上。訊土棍以所控。土棍不答。惟肆口大罵。某君令答之。罵愈厲。杖之。罵更厲。某君怒。令人於堂上掘坎。示若將活埋之者。而陰令掘坎之人埋至心際。卽止。不令遽死。冀其乞憐。卽取保釋放。不意土棍愈罵愈厲。而旁人亦願其速死。無一人代爲乞命。某君知無活之之理。遽令人持鎗至就坎中擊斃。不數日而某君活埋惡棍之名。噪於一邑。向之橫行於鄉里者。皆聞風遠避。邑以大治。然其後調任首邑。以事忤某山長。被其喉某御史。撫此事。劾之。遂至罷官。某君與山長初非有夙怨也。當其調首邑時。方蒞任視事。卽有以無故被禁年餘。未得省釋來訴者。某君訊之。則言去歲正月。方游行市中。誤撞某山長妻之輿。被輿夫辱詈。某不能

忍與相毆擊。詎未數刻。卽被某山長令人捆送至縣。縣官遽令下之獄。一繫年餘。黯無天日。今聞青天到任。故敢上訴。某君令提某山長之與夫至。則言此人實當街毆人。且乘間竊取小人之棉衣。故家主特令送縣。請青天勿爲疑惑。某君廉得其情。遽援筆書判語。張於署門。其大旨曰。查某山長送懲某人一案。據其所言。只是毆人竊衣。例不過科以笞罪。何至囚禁終身。況查去年正月某日。天正寒冷。與夫之衣。自當被於身上。何至置於轎後。被人竊去。況通衢之中。某人苟竊衣。何他人皆不之覺。其爲架詞誣告。顯而易見。揆其隱情。明係某山長因其不知避道。誤撞其妻之與。而與夫又被其還毆。遂怒而出。此然考向例。惟官長出門。方有清道之例。不許行人冲導。其他則雖以歸休之宰相。亦不能援照此例。何況於山長。何況於山長之妻。某山長恃勢欺人。凌虐鄉里。前縣某甘爲勢豪鷹犬。置小民於不顧。皆本縣所不取。合卽將某人釋放云云。某山長聞之大慙。怒遂以巨金餌某御史。効之去官。

某君又好忤權要。當慈安皇太后大行日。遺詔到粵。各

官循例於皇華館成服哭臨。某君時爲首縣。遽令購盈丈白布。大書官員軍民人等至此下馬。懸於轅門外。己則素服立於側。次日制軍張振軒宮保至。瞥見之。亟下輿入。惟某都統不之覺。仍乘輿入。某君大呼曰。此禁地。誰敢乘輿入者。都統乃亟下轎。步行而入。仍步行而出。事已都統大恨之。

又一日。某君往謁長將軍善。遽白曰。今上司檄縣禁賭甚嚴切。而大人所統轄營中。乃有設局聚賭者。非特良賤不分。抑且男女無別。不知大人將自禁之耶。抑由卑職拿辦也。將軍大慙。亟慰以好言。囑其不必聲張。別令人就某處察之。則果有一巨室。聚衆賭博。如某君所言。卽提爲首者。懲以嚴刑。而庇護之佐領以下各官。亦斥革有差。

記徐次舟觀察三則

徐次舟觀察廣陞。初以縣令仕粵東。歷署繁劇。喜以察察爲明。故士論或議其刻。然其強項之氣。有足多者。其攝南海縣時。值穆宗毅皇帝之喪。哀詔至。百官例赴萬壽宮哭臨。時廣州將軍某。舉止跋扈。肩輿直入。明日觀

察以丈許白布。大書文武官員軍民人等至此下馬。以竹竿挑之。素衣冠。執立於東華門外。若秉旂然。將軍至則揚於輿前。大呼請軍帥下馬。將軍無奈降輿步入。又某都統於國郵日鳴鑼出。爲觀察所遇。執鳴鑼者返署。杖之數十。仍送歸都統府。別具稟牘。謂倘律以大不敬當誅。姑念其無知細民。已薄懲之。仍請示辦法云云。都統無如何。反作函謝之。一時同僚罔不咋舌。又曾作函於某國領事。函中稱之曰貴領事。領事覆函。謂本領事職位等於貴國司道。貴國縣令之稱。司道曰大人。則閣下致函本領事。亦應稱大人云云。觀察以函致駁之。略謂敝國縣令之稱。司道爲大人者。以其爲司道也。貴領事職位雖等於敝國司道。而究非敝國司道。且兩國交涉係主客之誼。主客相交。無責人以稱謂之理。且大人二字亦何足爲榮。敝國有一種書畫家。無論爲與臺僕隸作書畫。皆稱之曰仁兄大人。貴領事如必責我以大人相稱。則我卽以此大人二字稱貴領事。恐貴領事轉滋不悅也。領事竟不能答。

相傳徐次舟觀察署南海令時。某老婦失一豕。指控爲

某甲所盜。甲稱冤。且曰。凡盜豕者。若驅之行。則蹢躅而遲。必爲人覺。故必荷之而趨。小人手無縛雞力。何能盜豕。觀察曰。誠然。吾亦夙知汝爲安分者。又念汝貧。賞汝十千錢。俾作小負販。嗣後當益圖上進。無負余之栽培也。言次。僕人已取十千錢置案下。甲大喜。叩謝。訖取錢。一荷肩上。起欲行。觀察斥之曰。止。汝謂手無縛雞力。十千錢何止六十觔。乃能荷之以行耶。吾未究爾盜豕之法。而爾先言之。是爾工於盜豕者也。顧左右呼杖。甲大懼。崩角自承。又一日。呼殿出。遇一童子哭於途。觀察見之。呼至。與前問何哭。曰。筐有二百錢。爲人攫去。故哭也。問何業。曰。賣油果。問油果安在。則舉其筐。曰。已售罄矣。問筐盛油果者耶。曰。然。曰。得錢亦置筐內耶。曰。然。曰。然則筐胡弗爲汝守錢。致被人攫。吾當爲汝審筐。卽帶童子及筐返署。一時途人聞傳徐青天審筐也。爭隨至署觀審筐。觀察升坐大堂。縱人入觀。於案上置水一盂。令來觀者自東階升。投錢一文於水中。然後自西階下。差役往來彈壓。毋少紊亂。諸人以一文錢細故。如命投之。觀察高坐監視。忽一人投錢訖。將趨下。觀察指之曰。

此搶錢賊也。搜其身。二百文猶在囊。以賊及所授錢均給童子。而懲搶錢者。人問何以知其搶錢。曰。一筐中雜置油果與錢。則錢必受油污。投之水中。油必上浮。故一望而知也。曰。何以知搶錢者之必來。觀察曰。吾揚言。審筐一時。路人爭傳。彼方笑吾愚。而疑吾顛。烏有不來者。脫不來。則觀審者無慮數百人。所得錢盡以畀童子。償所失。且有餘。亦足以了一事矣。

歸安徐廣陸次舟先生。晚年又號次髯。蓋自傷老大也。仕清時。嘗爲張曜李鴻章張之洞羅致幕中。頗資借箸。所著有不自慊齋文集。行世。多能頡頏古人。尤以宦粵時所撰蘇文忠廟碑起句云。文章爲一代之宗。景仰在千秋之後。胎息長。公爲人傳誦。公幕友吳劍潭。曾言公一軼事。決心辣手。亦有可傳。公初仕爲魯吏。詣寺拈香。有士人攔輿。公閱狀。訖納袖中。慰士人勿聲張。且歸候命。迨祀事畢。投刺謁方丈。僧出迎。公遽握其手。僧以病疽謝。公笑曰。余有奇藥。藏之久矣。立遣侍者歸取之。臨行叮囑某處者。是勿誤。僧感謝。公復與作口頭禪。僧亦忘其痛苦。少焉侍者返。以不獲報。公佯怒。斥侍者。顛預

邀僧就診。藉作盤桓。僧辭不獲。公遂屏輿從。與僧徒步歸。甫抵署。卽坐堂上。命拘僧伏階下。擲狀於地。僧知有異。面色死灰。叩頭無語。公令活埋。事後以擅殺自劾焉。蓋士人妻少艾。入寺進香。僧誘於密室。將加以非禮。妻忿極。咬僧指將斷。乘負痛間。奪門出。始得免焉。公旣得其情。復證僧手知無誣枉。又慮僧手眼靈通。稍縱卽逝。故悍然出此云。僧死有餘辜。公治非其道。酷吏之疑尙爲公惜。

滿員笑柄

吳縣潘文勤公（祖蔭）於前清光緒初。葉長刑部。有滿司員某。聞其好尙文雅。思所以媚之者。乃急就成詩數十首。恭楷錄正。於堂上署諸時揖而進之。文勤卽時繙閱。及首章題目。乃（跟二太爺阿媽逛廟）八字。（都人謂從曰跟。謂伯父曰太爺。阿媽者。滿人稱父之詞。都中隆福等寺。月有常期。陳百物以待。售往遊者。輒謂之逛廟云。）不禁狂笑。冠纓幾絕。某是時面若死灰。逡巡自退矣。

英中丞能服禮

英翰滿人也。清咸同間勦捻有功。除皖撫。極愛奢華。光緒初年。爲太夫人慶古稀。四方壽禮。無美弗備。尤以天長某令姑蘇繡幃爲特色。先是兩司壽幃張挂中堂。繼因繡幃佳麗。遂移易之。臬司孫公衣言氣節士也。預祝參觀時。見輕重倒置如此。怒曰。監司不及縣令耶。密約司道兩班禮成。卽返。明日如之。招待者留宴會。不可留。觀劇亦不可。白英知有故。第倉卒間不得其由來。太夫人聞之。知爲爭名分也。越日命英特設盛筵。作負荆舉。孫仍不可。疏通再三。許之。而以見於直隸會館相要。英如命。是日大會百僚。張宴演劇。孫獨後至。時孫負海內雅望。英故敬憚之。衣冠立門首。見孫至。未下。輿竟長跪道左曰。英某一時糊塗。乞先生恕罪。孫乃下。輿扶英起而謝曰。某非敢傲中丞。特怒某令太諂也。酬酢甚歡。終無芥蒂。惟某令旋引退。不復敢留矣。此徐雨棠在皖時目擊者。善夫孟子之言曰。長君之惡其罪小。逢君之惡其罪大。若某令者。殆逢惡之流亞歟。然孫能守禮。英能服禮。又俱不失爲賢者也。

裕庚出身始末

裕庚字朗西。本姓徐。爲漢軍正白旗人。父聯某字翰庭。道咸間任江蘇縣令。君子人也。庚貌岐嶷。幼而聰穎。讀書十行並下。過目成誦。有譽庚於其父者。聯曰。是兒聰穎自恃。不受範圍。愈貴顯愈不能保令名。吾料其必墮家聲。非福也。太息而罷。庚年十二。卽入國子監肄業。時勝保爲滿助教。亟愛之。遂由官學生入泮。十四食餼。十六選優貢。累應鄉舉不第。遂就職州同。從勝保軍。甫逾弱冠耳。下筆千言。倚馬可待。縱橫跌宕。有奇氣。凡奏報軍事。極鋪張揚厲之致。令閱者動目。故所至倒屣。勝敗後。裕回江。北省親。旋丁父艱。會馮魯川已由廬州知府權廬鳳道。隨巡撫喬勳駐壽州。馮與喬同年同鄉。又京師舊好。言聽計從。裕得馮汲引。入喬戎幕。司章奏。喬甚倚重之。同治五年。喬調撫陝西。裕亦相從。已洊升知府矣。喬乞休。英果敏撫皖。又入英幕。而權勢愈盛。甲戌歲杪。果敏擢廣督。裕以道員留廣東。事無大小。一決於裕。英惟畫諾而已。粵有二督之稱。其信任如此。聞姓捐事起。英入奏。謂歲可益百萬。不待命下。卽布告舉行。巡撫張兆棟。將軍長善。都統果勒敏。交章劾之。英裕皆革。

職未半年也。英舉家返京。裕亦隨之。光緒三年起英爲烏魯木齊都統。期年卒於任。裕佻傥無聊。有言於李文忠者。謂裕才可用。遂至津。文忠衆人遇之。適劉銘傳授臺灣巡撫。延裕往。得開復知府。發湖北。時鄂督爲張文襄。一見驚爲奇才。歷昇沙市漢口釐稅事。皆鄂省美任也。復得道員。以明保送部。轉內閣侍讀學士。奉使法國。六年歸。升三品卿。而雙目瞽矣。以至於死。裕妻前死。遺一子曰奎齡。妻婢鳳兒者。赤脚婢也。裕悅之。寵專房。繼又納京師妓。不容於鳳兒。服毒死。及罷官入都。邂逅一洋妓。實洋父華母所生也。洋妓者。家上海。有所歡入京。追蹤覓之。不得。乃遇裕。納之。鳳兒忿。而洋妓陰狠。能以術使裕絕鳳兒。且凌虐之。鳳兒不堪其虐。亦自經。於是洋妓以爲莫予毒也已。與裕約。不得再納妾。不得再有外遇。氣日張。權日重。玩裕於股掌之上。而服從終身焉。久之。立爲繼室。逼奎齡夫婦母之。奎齡不從。逃之蕪湖。匿縣令鄒雋之署中。雋之卽清末外務部尙書鄒嘉來之父也。無何病死。鄒爲之殮。奎齡妻爲覺羅續慶女。締姻時。續方爲潁州守。續無子。僅一女。甚鍾愛。嫁後。續夫

婦相繼亡。及奎齡逃。洋妓遂褫其婦之衣飾。斥爲鬻婢。婦不從。鞭之。裕偶緩頰。則誣以新臺之恥。久之。裕亦與之俱化。而朝夕鞭撻矣。裕之鄰爲英教士。居常聞呼號之慘。得其情。甚怒。將與理論。始稍稍斂其鋒。然續女亦傷重死矣。當洋妓之奔裕也。攜一子。小字羊哥。卽上海所歡之種也。繼又爲裕生一子。二女。裕更視爲天上人矣。洋妓固有才。凡英法語言文字。及外國音樂技藝。皆能之。二女旣長。亦工語言文字之學。嘗資緣入宮爲通譯。西國命婦之覲慈禧者。皆二女爲傳言。以故勢傾中外。會有外國女畫師者。慈禧命其繪油像。甚肖。將酬以資。畫師以其爲太后也。不索直。而二女竟中飽八萬金。未幾爲慈禧所聞。逐之出宮。乃之津之滬。廣交遊。開跳舞會。泰西之巨商皆與往來。二子名勛齡。馨齡。勛齡卽羊哥。皆入資爲道員。馨分湖北。勛分江南。皆爲端忠敏所擯。不知所往。及裕庚死。洋妓率其二女流寓上海。有年。不知所終。或曰隨洋人至歐洲矣。語云。知子莫若父。觀裕庚之結局。而聯翰庭之言驗矣。

劉傳楨出身始末

皖撫喬勤慤公駐軍壽州時。上元宗湘文太守源瀚薦一人來曰劉傳楨。宗之未仕浙也。曾從事江北糧臺。勤慤時爲兩淮運使。筦糧臺事。駐泰州。倚宗爲左右手。劉之來。卽委內署文案。劉不能文。不稱職。以宗薦故耳。劉時年二十餘。美豐儀。衣帽蘊藉。風流自賞。馮魯川嘲之云。顧影翩翩劉太守。卽指傳楨也。劉雖年少。已知府用直隸州矣。旣入幕。見裕庚爲喬所重。深相結納。師事之。率妻子與裕同居。裕亦不吝教誨。年餘。居然能爲公牘文字。卽書法亦酷似。其小有才如此。繼知某與馮魯川皆裕舊侶。亦過從甚密。厚貌深情。人皆不以爲忤。考其官之由來。則得之豫勝營。豫勝營者。李世忠歸誠後所統之軍。皆降衆也。劉入營後。不一年。自白丁而至四品官。孔雀翎。或曰李艷其貌。將以官爲餌。而龍陽之劉微窺其意不善。遂托故而逃。投勤慤也。迨勤慤入陝。繼之者爲英果敏。劉大見信用。筦捐輸釐金諸要職。亦三品銜記名道矣。同治庚辛間。揚州捐輸分局。亦劉所轄也。故時來揚。藉稽核公事。爲名。爲冶遊計。一日遇李世忠於青樓。劉莊容對之。李笑曰。爾勿作態。爾忘在營時爲

我提虎子邪。劉大恨次骨。從此不敢與李相見。在揚州以八百金購一小家女。年華碧玉。楚楚動人。畏人多言。不敢以捐局爲金屋。攜至礮艇中。設陽臺焉。於是鬢影衣香。掩映於長檣大戟間矣。劉時駐蕪湖。筦皖南釐政。歲必數遊揚州。以爲常。無何。英果敏丁外艱。滿大員例持服百日。卽視事。惟果敏父沒於京。須奔喪回旗守制。遂陳請半歲假。當是時。議所以護撫印者。故事。惟布政合格。時布政爲張兆棟。按察爲裕祿。兆棟孤介。不與諸人洽。而裕祿則與劉傳楨裕庚皆結爲兄弟。情好甚密。劉乃與裕庚謀。慫恿果敏奏請裕祿護撫印。旣舍布政而取按察。則疏中於張。不能無微詞。兆棟深銜之。粵東惡感。蓋恨於此矣。假滿。英回皖。張亦擢廣撫去。裕祿則坐升布政。同治甲戌冬。果敏擢粵督。裕祿又坐升皖撫。傳楨裕庚皆爲果敏所奏調。裕庚隨果敏先行。傳楨有未了事。約後期。不意次年五月。因擅開閘姓捐。英裕皆劾革矣。於時傳楨仍留皖。信用如故。繼而權安廬鳳穎等道。屢屢平將膺簡命。而大用焉。數年裕祿擢鄂督。傳楨自以爲皖中老吏。新撫必倚重。忽爲御史所糾。奉旨

命江督查辦。勘云。劉傳楨有奔走肆應之才。無監守臨民之器。降通判。賦閑年餘。蚤緣李文忠得筦淮軍支應。駐金陵。於是舊院笙歌。秦淮風月。朝朝暮暮。老死於是間焉。李世忠之罷官閑居也。以演劇博鑿爲樂。蓄優伶數十人。往來於長江商埠。博纏頭資。又於安慶居宅設博局。爲囊家賭甚豪。勝負常巨萬。貴遊子弟趨之若鶩。有吳通判弟某者。與博徒齟齬。爲衆毆辱。傷其臂。數日死。吳固不敢與李敵。又不甘隱忍。姑控於巡撫。取進止。裕祿受其詞。意不決。傳楨進曰。李世忠怙惡不悛。屢奉嚴懲之旨。猶不知斂迹。今又以賭博釀人命。當據實上陳。勿迴護。裕卽命傳楨屬草。草上奉旨就地正法。以除後患。遂斬世忠於中軍參將署前。劉之疏稿。蓋引用曾文正受降時語。有云。該逆雖已投誠。其心叵測。嗣後各督撫當隨時察看。如果有不安分之處。一面奏聞。一面卽行正法。李之死。卽死此數語也。不然。以優柔無識之裕祿。安敢死李世忠哉。非劉之銜恨。又誰憶二十年前之曾疏而引之哉。謂李之死。死於劉也。可。死於文正也。亦可。李世忠初名兆壽。亦賊中僞王也。投誠後改今名。

劉傳楨字文耕。江南上元人。家世微賤。至傳楨始以斜封貴。子二。長名家怡。捐納湖北知州。爲瑞澂劾罷。次某蚤緣入泮。發放時。以衣冠不整爲學使者戒飭。傳楨死。家居蘇州。今式微矣。二十年優孟衣冠。居然富貴。槐柯一夢。不堪回首。當年猶傳楨之幸也。傳楨有母弟曰傳林。幼失教。長傲飾非。好暱羣小。僞爲神經病。以抵觸正人。傳楨有客曰姚伯平者。桐城惜抱翁後也。好作諧語。傳林妻醜。見婦人有微姿者。輒羨之。於是修容飾貌。冀有所媚。伯平戲謂曰。爾欲爲紅樓之寶玉乎。傳林聞初亦不覺。繼忽怒曰。寶玉曾盜王熙鳳。豈隱刺我盜嫂耶。吾必撲殺此獠。紛呶竟日。闔局如沸。終使伯平謝過而後已。此在蕪湖事也。傳楨自以得官不正。必欲傳林博一第。以光門閥。然傳林亦小有才。詩詞駢體皆可觀。獨入股不能就範。於光緒己卯捷南榜。人皆異之。後以通判官廣東。遇麻瘋女幾死。補廣州通判。通省第一缺也。補十年。始得蒞任。一年卽被劾歸。然宦囊累巨萬矣。後不知所終。

糊塗叟

清之同治間。燕京市上有乞兒。人稱之爲糊塗叟。叟年六十許。鬚眉皓然。沿街乞得錢。旋散去。或悉至爆竹店買爆竹燃之。冬夏一葛不冠不履。若狂若癡。故人稱之爲糊塗也。而實不然。叟嘗荷一葫蘆而行。凡食者用者。悉納之葫蘆中。向人自稱葫蘆叟。或疑糊塗叟爲仙。爭向求道。叟曰。我非仙也。且古無仙也。言仙者。率欺人之言耳。或謂叟昔嘗爲山西某縣縣令。以剛直遭大吏怒。屢辱之。欲置之死地。叟乃棄家而遁。叟自言則曰。棄骨肉而圖自全。我不爲也。或又謂叟爲魯之某邑人。少有才名。屢應試不售。憤而爲此。叟曰。我固無才。卽抱才不遇。亦常事。何憤爲也。或問喜燃爆竹何爲。曰。驚他夢耳。問宿何許。曰。隨處是家。問葫蘆重幾何。曰。此悶葫蘆不。可使汝等知也。好事者多與之錢。叟曰。多非我所欲也。取數文。其餘悉還之。取得數文。又或與他丐。或與路上兒童。舉止不定。時朝政日非。叟慨然曰。亂將作矣。此不可留。未幾遂不復見。而莫知其所。之後三年。遂有庚子之變。

因禍得福

某中堂素善撝謙。有謁見者。雖微員末秩。向之叩拜。必一一答之。蓋習以爲常人亦不之異矣。一日有同鄉某入。貴爲太守。其意不過藉此一官。或冀到省後得一例差。爲仰事俯畜計。固不敢遽望補缺也。引見事畢。循例遍拜各同鄉。及至中堂宅第。手版既進。中堂以有鄉誼。立時請見。某衣冠僂僂入。至廳事。中堂已降階相迎。某隨之入廳。卽欲下拜。中堂謙不敢當。某堅欲行禮。中堂又力扶之。正在相持之際。某冠上之頂。忽貫入中堂朝珠內。互結不解。陡聞礮然一聲。線竟中斷。珠散滿地。中堂素多忌諱。心大不怡。某亦羞慚無地。勉強辭出。送之登車後。愈思愈憤。謂如此莽夫。眞是不上臺盤者。默識其名。擬俟其到省。函致大吏。予以參處。方消此恨也。明日入朝奏事畢。上忽問及某省有知府要缺出。吏部開單請簡。此缺多交涉事。必須能員。爾意中有可保之人乎。中堂略一思索。平日所有請托餽贈之人。一時竟無從記憶。上見其良久不語。頗有怒意。不覺惶恐萬分。連頓首曰。臣思此要缺。似非某人不能勝任。所謂某人者。卽跌散朝珠之某太守。因含怒於心。故其姓名獨牢。

牢記住也。上微領之。朝退。命軍機擬旨。特補某缺。後太守偵知其事。挽中堂之親信者。再三認罪。并餽以厚禮。中堂亦不復芥蒂。是真因禍而得福也。

勵太史

勵自牧守謙以世家子。官詞林。落魄不羈。索逋人常滿戶外。一日天氣甚寒。設盛饌宴客。客皆衣紫貂。海龍而來。室中多設火爐。勸酒甚摯。客皆出汗。解衣暢飲。公潛令家人取赴質庫。酒罷始以情告。次日各送還質券而已。又嘗游維揚。謁都轉某某。亦翰林後輩也。竟不見。公乃探得某陰事。作詩三十首。刊板先印一紙。送入某見之。惶窘不知所爲。既挽公素好者。饋以五百金。公乃將板消燬。此與宋胡旦假董儼珍器誑薛映三百金。同是不羈之才。未可拘以繩墨也。

記胡雪巖五則

胡有財神之目。相傳胡幼時作徒於某店。夜臥櫃檯上。半夜忽聞有人聲。急呼衆起。果得一賊。已僵矣。久之始醒。衆詢其故。則叩頭言貧不能自存。故踰垣入。冀有所獲。不意甫入門。卽見一金面神臥於桌上。遂不覺驚駭。

欲絕。衆乃扶而釋之。咸竊竊奇胡。

胡既富後。廣置姬妾。荒淫過度。精力不繼。有以京都狗皮膏獻者。胡得之大喜。蓋他春藥皆係煎劑。或丸藥之類。雖暫濟一時。然日久易致他疾。惟狗皮膏只貼於湧泉穴中。事畢卽棄去。其藥性不經由臟腑。故較他藥爲善。然京中他店所售皆僞物。卽有真者。而火候失宜。皆不見效。惟一家獨得秘傳。擅名一時。而有時亦以舊物欺人。僞作新者。故胡每歲必囑其至戚挾巨金入京。監製以供一年之用。所費亦不貲。某年有人於津沽道中遇其戚某。詢以何往。彼亦不諱言。并告以製膏法。惜日久忘之矣。

胡敗後。自知不能再如前揮霍。乃先遣散其姬妾之平常者。令其家屬領歸。室中所有亦任其攜去。所得不亞中人之產。迨後事漸亟。謠言將有籍沒之舉。乃亟擇留其最心愛者數人。餘皆遣去。則所攜已不及前。然猶珠翠盈頭。綺羅被體也。暨疾亟。其家人并其所留之姬遣去。則徒手而出一無所得矣。其幸不幸如此。江浙諸省於胡敗後。商務大爲減色。論者謂不下於庚

申之劫。蓋其時惟官款及諸勢要之存款。尙能勒取其居室市肆古玩爲抵。此外若各善堂各行號各官民之存款。則皆無可追索。相率飲恨吞聲而已。胡死之次年。值中元節。杭例有盂蘭盆會之舉。有輕薄子故於其居室前設一醺壇。懸蟒袍補服大帽皂靴及煙具賭具諸寓物於壁旁。懸一團扇。上題款曰雪巖仁兄大人法正。見者粲然。怨毒之於人亦甚矣哉。

胡之母享年九十餘。當胡未敗時。爲母稱觴於西湖雲林寺。自山門直至方丈房。懸挂稱壽之文。幾無隙地。自官紳以至戚族。登堂祝壽者踵相接。暨胡歿後。母亦繼歿。則其親友方避匿不遑。到者寥寥。其家新被查抄之命。慮人指摘。喪儀一切。惟務減殺。無復前之鋪張矣。論者或比諸紅樓夢之史太君。洵然。

姓之變更

今世之姓代有變更。如海寧陳氏之出於高也。聖祖以文簡相國奏辨知之。至高宗遂命文勤相國與漢軍高文良公聯族誼焉。嘉興錢文端公及鐔石宗伯本姓何。合肥李相國本姓許。則人知之者鮮矣。然由海寧陳氏

復承異姓者。如杭州張簡松先生雲璈。及道光丙午舉人戴陳常。皆是嘉慶年間南河河道總督司馬公。自言是海寧陳氏。於康熙初年承外祖姓爲司馬氏。至取異姓爲後者。蘇州吳修撰信中。係給諫玉崧。遊幕廣東途中所收養者。修撰狀元及第歸。給諫乃告之。俾迎養其母。人稱給諫之盛德。又聞乾隆時某相國。其封翁官石門少尉。乞養民家子帶歸。後公以狀元提督浙江學政。遣訪其家。止有一兄爲枵工餬口。人勸之往。則曰彼自爲學政。我自爲泥水耳。人咸歎此人之高致爲不可及。

胡先生

胡方字大靈。廣東新會人。家居學道。靜介自守。父喪三年不入內。有薄產盡以與弟。總督某聞其名。遣招之。方走匿他舍。肆中遇胡先生。市物不言二價。鄉中欲行詐者。輒曰恐胡先生知。時爲之語曰。可被他人答。勿使胡君知。他人答猶可。胡君愧殺我。

李編修

山陰李編修平抱羸疾。欲乞歸。封公遣書切責之。以壯年正可致君澤民。何得托病如歸。必杖殺之。乃卒於京。